

6. november 2025

UKA 2025/51

Qanoq ililluta ilaqtariinnut suliniarnitta annertusineratigut pisullu tamaasa isiginerisigut meeqqat angerlarsimaffiup avataanut inissinneqarsimasut amerlassusaasa annikillisarsinnaanerat pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Bo Martinsen, Demokraatit)

Siumut sinnerlugu apeqquteqaat aallaavigalugu oqallisissamik siunnersuuteqartoq, Bo Martinsen, Demokraatit qutsavigerusupparput oqallisissiamut soqutiginaateqartumut qaqitaanut.

Inuiaqatigiittut ajornartorsiuterpasuarfik pigisaqarnerput oqaatigissagutsigu uniorpallaarujussuanngitsoq Siumumi isumaqarpugut.

Ajornartorsiutit ilaatigut anginerit ilagileqqavaat meerarpassuit angerlarsimaffiup avataanut inissinneqartartut amerlasoorujussuummata aammalu sulii amerliartuinnartutut illutik. Kisitsisit kingulliit tusarluinneqartartut eqqarsaatigalugit meeqqat 800-init ikinnerunngitsut angerlarsimaffiup avataanut inissinneqarsimasut maanna piupput aammalu taakkua saniatigut meerarpassuit angerlarsimaffiup avataanut inissinneqarnissamik naliliiffigineqartussat ikigisassaanngitsut qanittumi tusagassiuutitigut sammeneqartut ilagaat. Taamaammat ajornartorsiut annertoqaaq inuiaqatigiinnullu akisoorujussuulluni.

Meeqqanik angerlarsimaffiup avataanut inissiisarneq annikillisarnerlugu anguniagaqarnerup sulii ullumikkornit annertunerusumik ukkatarineqarnissaa pisariaqartoq Siumumi isumaqarpugut, iliuusissallu pitsaasinnaasut tamaasa atorfissaqartippagut.

Ajornartorsiutip alligaluttuinnartup immikkut sammillugu paasisaqarfigilluarnissaa ilaatigut tunaartarlugu aasarli ilaqtariinnermut Peqqissutsimullu ataatsimiititaliami samminnilluta aallartippugut, ilaatigullu sammisap sukkut qanorlu oqimaatsorsiorfiusinnaasarneri annertuumik paasisaqarfigalutigit.



Tunngaviusumik soorunami angajoqqaat qitiupput aammalu angajoqqaat tassaallutik meeqqamik pitsaasumik, toqqissisimanartumik aammalu peqqinnartumik peroriartortinneqarnissaanut akisussaanerpaat. Angajoqqaarpassuaqarmalli taamaattunik aamma eqqaamassavarput, qujanarlu perorsaalluarnissinnut.

Meeqqat angerlarsimaffiup avataanut inissineqartartut eqqarsaatigalugit soorunami iliuusissat taama pisoqartariaqannginneranut tunngaviusinnaasut nungulluinnaraangata aatsaat pisarput, taamaakkaluartorli angajoqqaanniit meeqqanik peersitsisariaqarnerit peersitsigallartariaqarnerilluunniit amerlalluinnartuuneri ajuusaarnartuuvog alianarlunilu.

Meeqqanut pineqartunut angajoqqaarsiaasartut suliaq oqimaasinnaasaqisoq tigullugu suliassaminnik akisussaassuseqarlutik naammassinnittarsimasut aamma qujanartaqaat, taamatullu aamma assinganik ulloq unnuarlu paaqqinnittarfiit eqqarsaatigalugit.

Meeqqanik angerlarsimaffiup avataanut inissiisarnerup annikilliarternissaa anguniarlugu oqareernitsituut suliniutit suulluunniit pitsaasut atorfissaqartippagut. Siusissukkut iliuuseqarluni angajoqqaanngorlaat pitsaasumik tapersersorneqarnissaat pingaaruteqartoq Siumumi isumaqarpugut, taamaaliornikkut ilaqutariittut inuunermi toqqissisimasumik atugassaqarneq timitalerneqarsinnaalluartoq isumaqaratta.

Inoqarfinni tamani suliffissaqarniarnikkut periarfissat pitsaasuunissaat ilaatigut aamma pitsaasumik ilaqutariittut inuuneqarnissamik aqqutissaasinnaasut ilagigaat Siumumi isumaqarpugut, tassuunakkut angerlarsimaffeqarneq sunit tamanit pingaarnersaajusoq pilersinneqartarmat.

Ilisimavarputtaaq innuttaqaterpassuaqaratta inuunerluuteqartunik, ilaatigut imigassaq ikiaroornartorlu annertuumik atugaaneri pissutaallutik, taamatullu assinganik aningaasanoorajunnermik aamma peqquteqartumik. Tamakku aamma soorunami angerlarsimaffinni pissutsinut sunniuttarput, ilaatigut ajoraluartumik meeqqat angerlarsimaffinniit peersinneqartariaqarnerannik kinguneqartartumik.

Taamaammat katsorsaasarnerit pitsaasut sunniuteqarluarsinnaasullu atorfissaqartippagut, taamaaliornikkut ilaqutariittut inuunerup pitsaasup toqqissisimanartullu uterfigeqqinnissaanut aqqut naammassisinnaaqqullugu.



Aammali ilisimavarput pisortat sullissinerat imaluunniit sullissinerlunnerat pissutaalluni meerarpassuaqartartoq angerlarsimaffiup avataani suli inissisimasartunik, naak angajoqqaat meeqqaminnik tiguseqqinnissaminnik piareersimaleraluartut. Taakkua ilaatigut Inatsisartut ombudsmandiata ukiumoortumik nalunaarutaanni ersertarput, ajuusaarnartaqaarlu sullarlunnerup pianik meeraqartarmat angajoqqaamminnut utersinnaagaluartunik utersinnaangikkallartunik. Tamanna ilungersunarpoq aaqqiivigineqartariaqarlunilu.

Pisortani sullissisut pitsaasut suliaminnillu ilisimaarinnilluartut pigineqartariaqarnerat matumani pisussaaffiunera ersepoq, taamaammallu inulerisut sulianut pitsaasunut suliaqartarnissaannut sakkussarissaarnissaat illersugassaavoq, pikkorissaasernerillu annikilliliivigineqannginnissaat pingaaruteqartoq Siumumi isumaqarluta.

Naggataatigut Siumumiit naqissuseqqikkusupparput una, tassalu angajoqqaat tassaammata meeqqamik pitsaasumik peroriartornissaannut akisussaanerpaat, taamaammallu Inatsisartuni ilaasortaaqatitta, maanna Inatsisartuni siulittaasuusup Kim Kielsenip oqaatigisartagai imartuut issualaarusuppakka, imaappullu:

”Angajoqqaanaa!

Meeqqasi Pisortat meerarinngilai

Ilissiuku,

Asanninnerup pianik pilersitasi,

Pisariaqartippaasi!!

Inuunerup aqquataanik ilinniartissigit”

Siumumiit taamatut oqaaseqarluta oqallilluarnissassinnik aamma kissaappassi.

Anders Olsen

Siumut